



Komunikadu Imprensa

17 Janeiru 2013

Tribunál Distritál Dili kontinua julga kazu violénsia doméstika

Iha 17 Janeiru 2013 Tribunál Distritál Dili hala' o julgamentu ba krime violénsia doméstika.

Ministériu Públiku akuza katak iha 2 Juñu 2012 iha Becora Dili arguidu ho ínisial CMO basa, tuku no dada nia kónjuje nia fuuk no kuaza vítima ba baixa iha ospital Guidu Valadares. Ministériu Públika dehan katak arguidu prátika krime ne'e tanbá vítima fanu arguidu atu kous labarik ne'ebé tanis.

“JSMP louva autór judisiáriu sira tanbá kontinua fó prioridade ba julga kazu violénsia bázeia ba jéneru,” dehan Diretór JSMP Luis de Oliveira Sampaio.

Ministériu Públiku akuza arguidu kontra artigu 145 Kódigu Penál, kona-ba ofensa ba integridade fízika simples no konjuga ho artigu 2, 3 no 35 Lei Kontra Violénsia Doméstika. Ministériu Públiku husu ba tribunál atu kondena arguidu ho pena admoestasaun tanbá arguidu konfesa ona no kolabora di'ak ho tribunál.

Defeza husu ba tribunál atu haree sirkunstánsia atenuantes hanesan arguidu konfesa, moris hamutuk ho vítima, arguidu responsavel ba nia família.

Iha julgamentu arguidu hili direitu nonook, maibé resposta ba juis katak Ministériu Públiku nia akuzasaun loos hotu. Tribunál decide la presiza rona lezada no testamuña sira maibé suspende julgamentu ba iha dia 1 Fevereriu 2013 hodi rona desizaun final.

Kazu ne'e rejista iha tribunál ho Númeru Prosesu: 0047/2012/TDDIL. Julgamentu prezide husi Dr. Antonio Helder Viana do Carmo. Dr. Vicente Brites husi Ministériu Públiku no arguidu hetan defeza husi Dra. Marcia M. F. Sarmiento husi Eskritóriu Defensória Públiku.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883

